

Zeitschrift: Akzent : Magazin für Kultur und Gesellschaft
Herausgeber: Pro Senectute Basel-Stadt
Band: - (2010)
Heft: 4: Schwerpunkt Zoo Basel

Artikel: Dr. Dr.h.c. Carl Stemmler, 1904-1987 : er het alli Dier gäärn gha
Autor: Miville-Seiler, Carl
DOI: <https://doi.org/10.5169/seals-842848>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use


The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 31.03.2026

ETH-Bibliothek Zürich, E-Periodica, <https://www.e-periodica.ch>

Dr. Dr.h.c. Carl Stemmler, 1904 – 1987:

Er het alli Dier gäärn gha



lirem Zoologische Gaarte saage d Baasleren und d Baasler «Zolli» – die Kurzform deent wien e Liebesergläärig; im Grund isch s au aini. Wenn sich die elteri Generation an iiri Zolli-Erlääbnis vo friener bsinnt, no kunnt ere dr Ooberwäärter Carl Stemmler in Sinn, wien er mit «syyne» Schimpanse gspiilt het und mit ene spaziert und veloogfaaren isch. Wenn si ab uff d Bäum und trotz allem Riefe nit aabekoo sinn, het er numme miesse wyterlaufe, drno sinn si em gschwind noochegrennt.

Uff d Wält koo isch dr Stemmler z Schaffhuuse. Sy Vatter isch e bikannte Kürschner, Preparator, Ornitholog und Sammler gsi, wo zwai wichtigi Biecher iber d Aadler in dr Schwyz gschriibe het. Dr Soon, unser Carl, het zeerscht welle Medizin studiere, aber sy groossi Dierliebi het en in en anderi Richtig glänggt. Er isch 1927 Dierwäärter im Basler Zolli worde, zwanzig Joor speeter Ooberwäärter. Als Autodidakt isch er ze groosse zoologische Kenntnis koo und e rächten Expäärt in Sache Dierhaltig worde. Bsunders am Häärz glääge sinn em d Schlangen und d Schildgrotte, d Aideggse und d Veegel und am maischte d Menschenaffe, won er fir si e ney Fueterprogramm entwigget het. Alli Wält het gstuunt, won em d Gorillamueter Achilla iir Buschi in d Aerm gää het; das het no kai andere fertigbrocht. D Orang Utan hänn en fir ain vo iinen aagluet und sym Noofolger zeerscht dr Zuedritt verweert. Won er aber noo dr Pangsionierig wider byn enen uffdaucht isch, het dr Orang Utan Nico gmaint, er miess sy Dominanz vertaidigen und het em e Finger abbisse. 1945 isch em d Zucht vo Pythonschlange glunge, 1959 isch under syner Obhuets beriemt Gorillamaitli Goma geboore worde.

Dr Carl Stemmler isch aber au usserhalb vom Zolli aktiv gsi. Er het in Zytige gschriiben und Biecher pu-

bliziert, zem Byschpiil «Tiere im Zoo», «Kinder fragen» und «Haltung von Tieren». Legendäär sinn syni Radiosändige gsi, vor allem die fir Kinder. Däwääg het er bi zwai Generatione dr Sinn fir Dierschutz und Umwält gweggt, wo das noonig groossi Moode gsi isch. Noo dr Pangsionierig het er im Groosse Root (vo 1968 bis 1980) und im Burgergmaindroot fir Dierschutz und Umwält und geegen Atomgrawtewärgg kämpft. Fir all das het en d Universiteet Basel ane 1971 mit em Eeredoggtter-Titel uuszaichnet.

Fir syni Ideal het sich dr Carl Stemmler au als Redaggtter von ere Dierschutz-Zytig und als Mitgliid vo dr Redaggtionskommission vom Jugedschriftewärgg yygsetzt.

Am letschte Daag vom Joor 1987 het e rrych Lääbe sy Aend gfunde. Was blybt, isch d Erinnerung an e charismatische und lydeschaftlige Dierfrind, Zooloog, Fachmaa uff em Gebiet vo dr Dierhaltig und populääre Kämpfer fir d Dierwält und d Natur.

Carl Miville - Seiler